

Los ntawm Thawj Tswj Hwm
Henry B. Eyring

Tus Pab Cuam thib Ib hauv
Thawj Pawg Thawj Tswj Hwm



Tsev Neeg thiab Kev Thov Vajtswv

Muaj ib hmo, thaum kuv zaum ntawm kuv txiv lub txaj ib sab tas ib hmo, nws hais lus txog thaum nws yog ib tug me nyuam. Nws hais txog qhov uas nws niam nws txiv sib hlub txawm muaj tej kev nyuaj thiab hais txog Nws Leej Txiv Saum Ntuj Ceeb Tsheej thiab tus Cawm Seej txoj kev hlub. Kuv paub tias nws yeej yuav tas sim neej vim nws mob cancer, yog li ntawd kuv thiaj paub tias tej lub sij hawm nws muab nws Leej Txiv Saum Ntuj Ceeb Tsheej txoj kev hlub thiab nws leej txiv hauv lub ntiaj teb no txoj kev hlub thiab kev ua siab zoo sib xyaws. Kuv txiv hais ntau zaum hais tias thaum nws thov Vajtswv, nws xav tias nws pom tau Leej Txiv Saum Ntuj Ceeb Tsheej luag nyav.

Nws niam nws txiv tau qhia los ntawm nkawd tus yam ntxwv kom nws thov Vajtswv yam li nws hais lus rau Vajtswv xwb thiab Vajtswv yuav teb nws nrog txoj kev hlub. Nws yeej xav tau nkawd tus yam ntxwv mus txog thaum kawg. Thaum mob mob heev, peb nrhiav tau nws txhos caug ze rau nws lub txaj. Nws sab dhau lawm nws nce tsis tau saum txaj. Nws qhia peb tias nws tau thov nws Leej Txiv Saum Ntuj Ceeb Tsheej nug seb vim li cas nws yuav tsum raug mob npaum li no thaum nws yeej siv zog ua ib tug neeg zoo. Nws hais tias Vajtswv ua siab zoo teb hais tias: “Vajtswv xav tau cov tub uas ua siab loj.”

Yog li ntawd nws thiaj li nyiaj mus kom txog thaum kawg, ntseeg tias Vajtswv hlub nws, mloog nws, thiab yuav txhawb nqa nws. Nws tau koob hmoov vim nws paub thaum ntxov thiab yeej nco ntsoov tias Vajtswv nyob ze thaum yus thov Vajtswv.

Yog vim li no tus Tswv thiaj qhia cov niam tsev txiv tsev kom lawv qhia lawv tej me nyuam kom thov Vajtswv, thiab kom taug kev ncaj rau tus Tswv (saib Q&K 68:28).

Yexus Khetos txoj moo zoo raug muab txum tim rov qab los—nrog rau Phau Ntaww Maumoos thiab tag nrho cov yuam sij pov thawj hwj uas muab tsev neeg sib khi ua ke—vim Yauxej Xamiv yog ib tug tub hluas uas muaj kev ntseeg thov Vajtswv. Nws tau txoj kev ntseeg ntawd los ntawm ib tsev neeg uas sib hlub thiab rau siab ntseeg.

Nees nkaum xyoo tas los lawm tus Tswv qhia tej tsev neeg txog cov lus no nyob hauv “Tsev Neeg, Ib zaj Lus Tshaj Tawm rau lub Ntiaj Teb” los ntawm Thawj Pawg Thawj Tswj Hwm thiab Pawg Kaum Ob tug Thwj Tim: “Tej kev sib yuav thiab tej tsev neeg uas kav ntev raug tsa thiab nyob mus li ntawm tej kev ntseeg, kev thov Vajtswv, kev hloov siab lees txim, kev zam txim, kev sib hwm, kev hlub, kev khuv leej, kev ua hauj lwm, thiab kev ua si uas tsim nyog ua.”¹

Peb ris tus Yaj Saub Yauxej Xamiv tsev neeg txiaj vim lawv tu nws loj hlob zoo heev. Nws tsev neeg koj yam ntxwv zoo txog kev ntseeg thiab kev thov Vajtswv, thiab kev hloov siab lees txim, kev zam txim, kev sib hwm, kev hlub, kev khuv leej, kev ua hauj lwm, thiab kev ua si uas tsim nyog ua.

Tej tiam neeg tom qab nej yuav hais tias nej tau koob hmoov vim nej koj yam ntxwv thov Vajtswv nrog nej tsev neeg. Tej zaum nej yuav tsis tu Vajtswv ib tug tub qhe loj hlob, tiam sis los ntawm nej tej kev thov Vajtswv thiab tus yam ntxwv ntawm kev rau siab ntseeg nej yuav pab tus Tswv Yexus Khetos tu cov thwj tim zoo loj hlob.

Los ntawm txhua yam uas nej yuav xaiv ua kom pab tus Tswy, kev thov Vajtswv yog qhov tseem ceeb tshaj plaws. Muaj tib neeg uas zoo li peb txhua tus, tiam sis thaum lawv thov Vajtswv, lawv ua rau lwm tus xav qhib qhov muag kom lawv thiaj pom leej twg nyob ntawd. Nej ua tau ib tug neeg zoo li no.

Cia li xav seb qhov ntawd yuav muaj nqi npaum li cas rau cov uas txhos caug nrog nej thaum nej tsev neeg thov Vajtswv ua ke. Thaum lawv xav tias nej muaj kev ntseeg thov Vajtswv, lawv txoj kev ntseeg yuav loj hlob tuaj ua rau lawv xav thov Vajtswv thiab. Thaum nej thov Vajtswv ua Nws tsaug rau cov koob hmoov uas lawv paub tias lawv twb tau txais lawm, lawv txoj kev ntseeg yuav loj hlob tuaj kom lawv ntseeg tias Vajtswv hlub lawv thiab Nws teb nej tej lus thov thiab Nws yuav teb lawv tej lus thov thiab. Yuav muaj li no thaum nej tsev neeg thov Vajtswv ua ke tsuas yog nej tau thov Vajtswv nej tus kheej txhua lub sij hawm.

Kuv tseem tau koob hmoov los ntawm ib tug txiv tsev thiab ib tug niam tsev uas tau sib tham nrog Vajtswv. Qhov uas lawv coj yam ntxwv qhia txog lub hwj chim ntawm tsev neeg txoj kev thov Vajtswv ua ke tseem foom koob hmoov rau tej tiam neeg uas ua neej nyob tom qab lawv.

Kuv cov me nyuam thiab cov xeeb leej xeeb ntxwv tau koob hmoov txhua hnuv los ntawm kuv niam kuv txiv tus yam ntxwv. Lawv tau kev ntseeg hais tias Vajtswv yeej mloog thiab teb lawv tej lus thov. Nej muaj peev xwm tsim ib qho zoo li no uas nej tsev neeg yuav nco ntsoov. Kuv thov Vajtswv kom nej yuav ua li no.

LUS CIM

1. "Tsev Neeg: Ib zaj Lus Tshaj Tawm rau lub Ntiaj Teb," *Liahona*, Kaum Ib Hlis Ntuj 2010, 129.

UA KOOB TSHEEJ NCO TXOG XYOO THIB 20 TXIJ THAUM MUAJ LUS TSHAJ TAWM TXOG TSEV NEEG

"Tsev Neeg: Ib zaj Lus Tim Khawv rau lub Ntiaj Teb" qhia txog tej ntsiab cai uas tseem ceeb niaj hnuv no ib yam li thaum tshaj tawm thaum lub Cuaj Hli Ntuj hnuv tim 23, xyoo 1995. Xav seb puas tsim nyog caw cov neeg los sis tsev neeg uas koj qhia kom lawv ua koob tsheej nco txog xyoo thib 20 txij thaum muaj lus tshaj tawm thaum koj:

1. Hais tej ntsiab cai nyob hauv zaj lus tshaj tawm no uas muaj nuj nqi heev rau lawv. (Cia li saib Thawj Tswj Hwm Eyring ua li no thaum nws hais txog kev thov Vajtswv nyob hauv zaj lus saum no.)
2. Sib tham seb txhua lub ntsiab cai yuav foom koob hmoov li cas rau lawv hnuv no thiab yav tom ntej.
3. Cuab hom phiaj kom ua raws li tej lub ntsiab cai ntawd nyob hauv lawv lub neej thiab qhia tej ntawd rau lwm tus.

TUB HLUAS NTXHAIS HLUAS

Ua Kom Kev Thov Vajtswv Zoo Zuj Zus

Thawj Tswj Hwm Eyring qhia hais tias koj tsev neeg yuav tau koob hmoov thaum koj sib raug zoo nrog koj Leej Txiv Saum Ntuj Ceeb Tsheej. Koj haj yam sib raug zoo nrog Nws thaum koj ua kom koj txoj kev thov Vajtswv zoo zuj zus! Nov yog ob peb lub tswv yim ua li ntawd:

Ua ntej koj pib thov Vajtswv, cia li siv sij hawm me ntsis xav txog tej yam uas koj xav hais. Cia li xav txog tej lus nug uas koj muaj los yog tej yam uas koj txhawj txog—koj sau tau tej ntawd koj thiaj yuav nco ntsoov. Cia li siv lub sij hawm no kom koj tsis xav txog tej xwm txheej ntawm ib hnuv koj thiaj yuav tsom ntsoov rau tus Vaj Ntsuj Plig Dawb Huv tej kev tshoov siab. Yog koj xav txog qhov ub qhov no thaum koj thov Vajtswv, cia li sim xam pom hauv koj lub siab tias Leej Txiv Saum Ntuj Ceeb Tsheej mloog koj. Hais meej heev. Thiab, cia li tsej ob peb feeb cia thaum koj yuav xaus kev thov Vajtswv kom mloog tus Ntsuj Plig tej kev tshoov siab. Tej zaum koj yuav xav sau tej kev tshoov siab uas koj txais nyob hauv koj phau ceev xwm txheej.

Cia li nco ntsoov tias kev thov Vajtswv yog ib yam hauj lwm, yog li ntawd txhob txhawj yog tias koj yuav tsum xyaum los sis ua rau koj xav tias kev thov Vajtswv yog ib qho nyuaj! Qhov uas koj siv zog thov Vajtswv yuav pab koj sib raug zoo nrog Vajtswv uas yuav foom koob hmoov rau ntau tiam neeg tom ntej.

COV ME NYUAM

Kev Nco txog Kev Thov Vajtswv

Thawj Tswj Hwm Eyring qhia hais tias koj yuav tsum thov Vajtswv nrog koj tsev neeg. Koj muaj peev xwm coj yam ntxwv zoo rau koj tsev neeg thaum koj thov Vajtswv txhua hnuv. Koj kuj muaj peev xwm hais kom koj tsev neeg thov Vajtswv txhua hnuv. Nco ntsoov qhov uas Thawj Tswj Hwm Eyring hais nyob hauv lwm zaj lus: "Leej Txiv Saum Ntuj Ceeb Tsheej hnouv nej tej lus thov. Nws hluv nej. Nws paub nej lub npe." ("Pheej Txais Kev Tshwm Sim," *Liahona*, Kaum Ib Hlis Ntuj 2014, 73) Cia li sau tej lus no rau ib daim card los yog ib daim ntawv thiab tso rau ib qho chaw uas koj tsev neeg tag nrho yuav pom. Ua li no mas koj yuav nco ntsoov tias Leej Txiv Saum Ntuj Ceeb Tsheej xav hnouv koj xov!

(c) 2015 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelika. Pub txhais ua lus Akiv : 6/15. Pub txhais ua lus Hmoob: 6/15. Kev txhais *First Presidency Message, September 2015*. Hmong. 12589 295



Kev Ntseeg,
Tsev Neeg, Kev Pab

Tej Cwj Pwm ntawm Yexus Khetos: Muaj Hwj Chim thiab Muaj Yeeb Koob

Ua tib zoo thov Vajtswv kawm tej yam no thiab nug seb koj yuav tsum qhia dab tsi. Qhov uas koj to taub tus Cawm Seej tej cwj pwm yuav ua rau koj txoj kev ntseeg Nws loj tuaj thiab foom koob hmoov li cas rau cov uas koj mus saib xyuas tom tsev? Kom tau ntaub ntauv xov xwm ntxiv, cia li txuas rau reliefsociety.lds.org.

*Nov yog ib zaj los ntawm tej zaj cov
Mus Saib Xyuas Tom Tsev tsab Xov uas
hais txog tus Cawm Seej tej cwj pwm.*

Cov vaj lug kub qhia peb tias Yexus Khetos tau txais hwj chim tag nrho, nyob saum ntuj thiab hauv ntiaj teb tib si, thiab Leej Txiv lub yeeb koob nyob nrog nws (saib Q&K 93:17). Txwj Laug M. Russell Ballard ntawm Pawg Kaum Ob tug Thwj Tim hais tias los ntawm lub hwj chim no peb tus Cawm Seej tau tsim lub ntuj thiab lub ntiaj teb, tau ua tej txuj ci tseem ceeb, thiab tiv tau txoj kev mob nyob hauv Khexemanes thiab Khavalis.¹ Thaum peb to taub qhov no, peb txoj kev ntseeg Khetos yuav loj zuj zus tuaj, thiab peb haj yam yuav muaj zog.

Thaum peb ua thiab ua raws li kev khi lus hauv lub tuam tsev, tus Tswv foom koob hmoov muab Nws lub hwj chim rau peb. Linda K. Burton, Koom Haum Niam Tsev tus tuam thawj tswj hwm, hais tias: “Kev ua raws li peb tej kev khi lus yuav pab kom peb muaj zog, muaj hwj chim thiab kev pov hwm. . . .Tsis ntev tas los kuv ntsib ib tug phooj ywg tshiab. Nws ua tim khawv hais tias tom qab nws tau txais nws lub

vaj txiaj ntsim hauv lub tuam tsev, nws muaj zog vim nws muaj hwj chim tiv tau tej kev ntxias.”²

Nifais ua tim khawv txog lub hwj chim ntawm kev khi lus: “Kuv, Nifais, tau pom Vajtswv tus Me Nyuam Yaj lub hwj chim, nws tau nqis los rau saum . . .tus Tswv cov neeg uas tau khi lus tseg, . . . thiab lawv tau muab txoj kev ncaj ncees los ua ntaj riam thaiv lawv thiab nrog rau Vajtswv lub hwj chim uas muaj yeeb koob heev” (1 Nifais 14:14).

Vaj Lug Kub Ntxiv

Yelemis 51:15; Tshwm Sim 1:6;
Yakhauj 4:6–7; Mauxiyas 3:17

Los ntawm cov Vaj Lug Kub

Vim Yexus Khetos hlub Mathas thiab Maivliag, Yexus Khetos tsa nkawd tus nus Laxalus sawv hauv qhov tuag rov qab los los ntawm Vajtswv lub hwj chim uas Nws muaj.

Yexus tuaj txog Mathas thiab Maivliag lub tsev tom qab Laxalus nyob hauv lub ntxa tau plaub hnuv lawm. Lawv mus rau Laxalus lub qhov ntxa, thiab Yexus txib kom lawv muab daim txiag zeb tshem tawm ntawm lub qhov ntxa. Yexus

hais rau Mathas hais tias, “Kuv puas tau hais rau koj tias yog koj ntseeg koj yeej yuav pom Vajtswv lub hwj chim xwb no?” Ces nws thov Vajtswv Leej Txiv thiab “hu nrov nrov hais tias, Laxalus, koj cia li tawm los.

“Laxalus txawm tawm los, tej ntaub tseem qhwv nws tes taw thiab muaj ib daim ntaub npog nws lub ntsej muag.” (Saib Yauhas 11:1–45.) Tus Cawm Seej siv Nws lub hwj chim kom txhiv peb dim thiab muab hwj chim rau peb. Peb txoj kev ntseeg Nws yuav loj tuaj thaum peb nco ntsoov tias Nws muaj hwj chim thiab muaj yeeb koob.

LUS CIM

1. See M. Russell Ballard, “Nov Yog Kuv txoj Hauj Lwm thiab lub Yeeb Koob,” *Liahona*, Tsib Hlis Ntuj 2013, 18.
2. Linda K. Burton, “Lub Hwj Chim, Kev Xyiv Fab, thiab Kev Hlub Thaum Ua Raws Li tej Kev Khi Lus,” *Liahona*, Kaum Ib Hlis Ntuj 2013, 111.

Xav Txog Qhov No

Vajtswv lub hwj chim muab hwj chim thiab yeeb koob rau peb li cas?